



5. marts 2010  
14. august 2009

UPA 2010/17  
UKA 2009/21

Inatsisartut suleriaasianni § 32 naapertorlugu matumuuna aalajangiiffigisassatut siunnersuummik imaattumik saqqummiussissaanga:

**Kalaallit Nunaanni ilinniaqqiffiusuni ilinniartitsinerup qaffasissusaata misissorneqarnissaanik imaqartumik misissuinissamik aallartitsinissaamut Inatsisartunut aaliangiussassatut siunnersuut. Misissuineq sanilliunneqarsinnaasariaqassaaq misissuinerut nunani killerni allani ingerlanneqarsimasunut assigusunut.**

(Inatsisartunut ilaasortaq Niels Thomsen, Demokraatit)

### **Tungavilersuut**

Nuannerpoq kalaallit inuusuttut nunatsinni ilinniaqqinnissaminnut periarfissaqarmata. Pingaaruteqarporli ilinniartitsit qaffasissutsimikkut nunani killerni ilinniartitsit assigusuni sanilliunneqarsinnaasariaqarnissaat.

Amerlanernit paasineqariartorpoq Kalaallit Nunaanni immitsinnut mattulluta inuusinnaanngitsugut. Ajortuni ajunngitsunilu nunarsuarmut tamarmut inuiannut ilaavugut. Demokraatit paasinnittarnerat malillugu tamanna isumaqarpoq, nunarsuaq tamakkerlugu suleqatitsinnut sanilliussinnaasumik ilinniartitaanermi qaffasissuseqarnissarput anguniartariaqaripput. Kinguaraluarutta unammillersinnaajunnaarlutalu arlaatigut inuiaqatigiinnut uatsinnut ikittunnguusunut kingunerluttussaavoq.

Taamaammat pingaaruteqarpoq inuusuttortatta ilinniaqqiffissaqartinneqarnerat naammagisimaaginnarlugu iluarusuutigiinnannginnissaa. Ilinniartitsit qaffasissutsimikkut tulluunnissaat qularnaartariaqarparput. Nunatsinniinnaq atorneqarsinnaasunik nunanili allani suliffeqarfinni atorneqarsinnaanngitsunik inuit ilinniagaqartikkaluarutsigit imminut akilersinnaanngilaqs. Taamaaliorutta unammillersinnaanngornavianngilagut.

Oqanngilanga ilinniaqqiffiit maani pigisagut nunani allaniit appasinnerusumik inissisimasut. Oqarniarpongali qaffasissutsip misissorneqarnissaa kissaatigalugu, taamaalilluta pisariaqalissappat politikkikkut suliarilluakkamik tungavissaqalernerussagatta.

Misissuineq Ilisimatusarfik ilinniaqqiffiillu allat maani nunatsinniittut peqatigalugit suleqatigilluarlugillu ingerlanneqartariaqarpoq. Pingaaruteqarporli aamma nunani allani misilitagartuut atuisuusullu misissuinermi peqataatinneqarnissaat, taamaalilluni misissuineq sapinngisamik tungavissaqarluarsinnaanerussammat.

Taamatut oqaaseqarlunga Naalakkersuisut akissuteqaatissaat partiillu allat ilanngussaqaqarnissaat qilanaaraakka.